

四庫全書

集部

欽定四庫全書

集部

筠軒集卷二

詳校官庶吉士臣陳若霖

中書_臣劉源溥覆勘

總校官進士臣楊懋珩

校對官助教臣胡予襄

謄錄舉人臣鍾廷瑛

欽定四庫全書

集部五

鈞軒集

別集類四

元

提要

臣等謹案鈞軒集十三卷元唐元撰元字長孺歙縣人與洪焱祖俞趙老號新安三俊泰定丁卯以文學授平江路學錄再任建德路分水縣教諭以徽州路學教授致仕卒集中朱克用總管詩會序作於至正乙酉自題七

十七歲推而上之生於宋咸淳五年己巳蓋其始終當元盛時故所作多和平溫厚之音極為虞集所推許又嘗著易大義見聞錄諸書於經術頗深其議論亦不詭於正特元以鄉校祿終其身未嘗入官臺閣而集中有扈從灤陽清暑四詩玉堂夜直詩及察罕諾爾李陵臺諸詩未喻其故疑嘗從人扈蹕上都有所酬和而傳寫者脫其標題也据朱文選

行狀元有敬堂襍著思樂襍著吳門襍著分
陽襍著金陵襍著藪稿幾七千篇分為五十
卷乃其子桂芳手輯故集中間有桂芳題識
此本為程敏政編入唐氏三先生集者僅詩
稿八卷文稿五卷則其所佚固不少矣案元
史方技傳述元代塑像精妙者為劉元諸人
而此集有王才塑工贊稱中州塑工精妙遠
甚飛土為像切中繩墨太原王才實超等倫

是元時工此藝者尚多亦可以補史所未備
云乾隆四十三年五月恭校上

總纂官臣紀昀陸錫熊臣孫士毅

總校官臣陸費墀

筠軒集原序

詩以格高為第一三百五篇聖人所定不敢以格目之
然風雅頌體三比興賦體三一體自有一格觀者當自
得之於心自騷人以來至漢蘇李魏曹劉亦無格卑者
而予乃創為格高卑之論者何也曰此為近世之詩人
言之也予於晉獨推陶彭澤一人格高足方嵇阮唐惟
陳子昂杜子美元次山韓退之柳子厚劉夢得韋應物
宋惟歐梅黃陳蘇長翁張文潛而又於其中以四人為

格之尤高者魯直無已上配淵明子美為四也吾州在萬山間詩人不少朱文公早為胡邦衡以詩人薦公配享孔庭人品近孟子不止於詩唐長孺諱元自里中來訪出詩五十四篇始年三十六歲其所以可人意者格高也何以謂之格高近人之學許渾姚合者長孺掃之如粃糠而以陶杜黃陳為師者也藝圃有作所謂小園僅百步者凡十六句似乎擬陶後二首亦然予為題曰藝圃小集而序之以歸博讀精思而苦於吟進可量哉

大德八年甲辰九月二十日同里方回萬里敘

元頃自金陵南軒代還寓隱問政山中性資頑鈍凡以
遊戲筆墨取重士林者一無能焉惟日緇閱舊書早歲
所未悟者如戶牖塞開遽登堂室急如破竹迎刃而解
及為應俗文字每因平旦清明纔一觸所思浩浩乎覺
其來之易無向來躡嚅艱澁之狀心私竊喜況在金陵
時會繼學侍御王公夢臣侍御張公甚加稱引志行晉
仲公日承磨礱各賜贈言如拱壁而歸古人所謂閉門

造車出門合轍亦一時之奇遇也自己卯至丙戌凡八年得詩文若干今去其大半文得若干詩得若干命生徒繕寫求同志者訂焉削之又削取百十於二三始遂吾志莊生所謂道在稊穉雖不足熟饜人腹然生意所發或以為可觀非愚之所望也至正丙戌九月望七八翁唐元自序

欽定四庫全書

筠軒集卷一

元 唐元 撰

五言古詩

藝圃

小園僅百步花竹藝兩行垂垂結夏實蕭蕭吹晝涼
盆池曉更靜照我鬚鬢長復有青青蒲風至互低昂
人生百歲內弱草栖螢光亮無貞堅節何以禦雪霜
達人豈

求名進善貴自強用世苟不能退居固其常

又

舊種竹數十生笋已滿園今年笋更繁
齷齪穿鄰垣山童劬煙雨便欲供朝餐
獨不忍饒口保此青琅玕物微志則遠
當異今日觀平生遲暮心與爾同歲寒

又

種莧甲已坼苦菜行亦秀耰鋤不憚勤
常恐地力瘦旦旦望其長灌溉那敢後
牆頭有蓬蒿不種而自茂此意

定如何為爾吟清晝

感寓

朝光上疎牖開門望青天小雀已啾雜老鸛何盤旋造
化生萬物營營孰不然大小固分殊過得非爾賢所以
盤中蠅不及枝上蟬風露腹亦果立蛻如飛仙

又

入山復出山風雨飽迎送重雲莽回互百卉同機綜野
獸號我前山禽發幽哢團團青油蓋路永力愈重茅簷

喜暫息趣去勤僕從一牛上荒壠畢意在耕種牧兒徐
驅之鞭朴幸勿用

上憲使疎齋廬公

茗茗椅桐樹茂茂岐山陽深根託高岡脩幹凌霄蒼威
鳳來何從栖止有輝光鮮羽曜朝日五色成文章所飲
必醴泉竹實充飢吭衆鳥不敢鳴況迺相頡頏覽輝下
千仞一來效禎祥何當命師夔聲此邦家昌

又

幽蘭在中林靡靡裒朝露豈不羅衆芳芬菲乃天賦枝
莖蔽荆杞況當薪蒸路晚歲益自珍豈以無人故佩紉
弗見收好潔元非誤志士感蕭晨念此令人懼

贈于履道

山風吹我衣山石啗我足陰壑迷寒雲陽岡曜晴旭坡
陲陟峻嶺迢遞下平陸舉頭望前人烏帽屢出沒百年
白髮新名利紛馳逐胡為不歸來芋栗山中熟

又

君詩一角麟我句虻百足同吟旅瑣瑣寒燈幾昏旭益
窺所抱竒江潘而海陸功名貴自強射石期矢沒願言
比雲龍上下相隨逐歸歟力硯田肯媿稊稗熟

過瑤嶺有懷孫君玉嶺下即君玉所居

前登陂陀嶺却望青林隈青林澹朝暉雲氣相徘徊念
我故人居軒戶臨溪開圖書列左右琴酌無氛埃懷寶
固待價傾國寧求媒晚定金石交顧我非其才崇墉若
萬里未見心為摧露零竹輿語短褐寒風催微醺續殘

夢未省先驚回思製芙蓉裳與子同剪裁

汪氏孝節堂觀泉得清字

靈巖蓄玄德斗斛匪自盈神女之所唾千古留琮琤苔
竹映佳色窓戶含餘清如何市塵底斯境得若驚人間
涸澤時石溜方流行溥博雖寡用浚潔寧無情伊余二
三子屏迹庶自名於焉俯清影幸不慚塵纓屢游意始
愜盃炙非所營煩君慎水符煮茗頻相迎

九日偕景韶練溪君玉諸先輩譙桂泉菊圃分

韻得菊字

平生劉子政便便笥經腹鴻寶誤信書遲暮返初服塵
中地百弓手蒔三春菊養苗待秋深條已耀人目畦荒
韭尚腴槽鳴酒初熟隨騶美周士衆輻共一轍餐英政
使癯未因鄙梁肉搖搖燭見跋艷艷月出屋請席願淹
留清談修文郁

黥山絕妙翫不忍去

輿夫老若鈍足顛肩亦賴堅坐我不忍趨走便且輕後

乘幸勿亟前有黥山迎平生所未識目駭而心驚委蛇
出異態婉婉含深情長虬挂碧落巨怪浮溟瀛冠冕或
儼立甲冑何縱橫未吟先惆恍欲畫難經營邑連壤最
沃俗美人不爭意有隱君子依阻仍深耕遺世了榮辱
避俗變姓名尋之不可見晤言誰與傾

桂泉席侍飲湯北村楊志行郭祥卿諸公

構堂俯虛市把酒對遠山竹樹愛深密石溜聆潺湲行
吟墜葉響坐遲孤雲還撫物景易變觀化心自閒肅肅

金史卷一百一十二
文翰賓悠悠霄漢間問答綴道論愉懌貽好顏情申志
未畢反旆何由攀

病起行圃

閉門了三春萬事一木榻衰病苦見侵懶慢日相軋心
兵百戰罷頗亦厭紛奪瘡痍費爬搔痒定痛若割匪惟
交親疎往往廢書札腐儒困朝餐正不辨麤糲酒徒逐
鳥散招呼謝嘈聒茗粥定差賢庶以慰羌渴今晨偶窺
園雨後葵韭活物生寓至理二氣妙旋斡細響出清渠

微青迸枯枿適予病初瘳而乃心目豁聖道嚴階梯坡
陲積毫末行當理舊學志肯憂短褐申情布同志夫豈
貴專達

病後雜書

江南地卑濕重脰得其偏先子年半百此疾懷憂煎我
時在侍旁常恨無酒錢典衣喚軟脚沃之令醉眠呻吟
尚挂耳翻思淚迸泉大塊亦寡恩衰疾蚤見纏稚子饋
我藥我懷何可言

晴簷看蛛網經緯整且勻極知心獨苦正爾營一身小
智罩飛蟲用意乃不仁虎狼甫墮地氣已欲食人天地
且不言志士空愴神好風池上來吹我微岸巾沈疴遂
一快步月歸柴門

忍飢陳正字不識治生理妻子依婦翁豈顧流俗鄙平
生檳榔餅不滿一餐齒可憐兒啼飢中夜成坐起貧病
若膠漆吾事乃如此丈夫不能食出口已可恥世無魯
公賢乞米徒勞耳

送楊志行廣文還金陵

揚侯歌雅南俚俗豈同調
昂昂氣沖霄蕭蕭容在廟
清臺早湔祓霧隱出文豹
詞林侈瓊琚一世稱獨妙
人言薄采芹脂轄匪前料
蕭蕭霜露嚴寒蟲夜相弔
士習久不古過眼幾高蹈
千鈞一髮危愷悌神所勞

薛山甫與僕並隣見過甚數
益齋宋公以廉能治邑山甫
實賓其門喜其得賢主人也
作詩寄之

鷺鳥雖累百一鶚迺為奇鶚鳴集鬼域衆謂鳳凰兒爾
曹飽欲死此生常忍飢碧眼送晴空朝來有新詩

又

陶隣劉柴桑杜亦隣朱阮時情甘若醴但覺古風遠清
談玉屑霏共此晴雲捲寒燈勗苦心歲晚以無倦

又

萬物皆托體蟬魚食文字蛭蜣但轉丸亦復事汝事君
子有時愚小夫任私智清裁豈無人酒食何足議

又

桃花光灼灼春風滿琴堂此客須此主正直如羔羊為
政但飲水此味真悠長區區期會間葛屨行朝霜

九月二十八日督校廩如東閣偶偕同遊登西

嶺作

西上坡陀嶺天風吹我衣齊雲矗其南獨聳高巍巍霧
收澹晨曦窈窕開巖扉巒石互馳騁水木相因依顧瞻
百里間行人如蟻微山下誰歟居寒塘嘉果肥鳴鷄破

午寂犬卧來客稀四序有代謝秋令行當歸塞予事校
廩委瑣遭評譏倚杖督朝穫日暮常歔歛幸接田父言
耕也理不違同游愜心賞天馬方辭轡煩跼自茲釋寶
唾時一揮

贈石庵道者

道人東吳來空山挂瓶錫空山何所有中有浮雲白蕭
條紅樹秋渺漭寒溪碧高閣遶層阿荒堦絕人迹焚香
禮大士幽磬了晨夕勞生我未已衰鬢稍見迫慨茲區

中緣愛彼松下石出門馬長鳴倉皇又行役

題使君渡水羅漢圖

愛河浪滔天萬境同一夢高僧鼓慈航與法作梁棟應
緣聊住世振迹還靈洞偶來涉清澗白足聊玩弄明明
十六輩妙相疑伯仲湛然諸漏盡心與潭月共鞵笠費
提擎天風落吟諷此水本空明誰牽萬波動塵根待漸
被行脚我何用願言八功德散作人天供西江戒口吸
長者煩囊送灌溉法王苗有情俱可種

示阿桂

小桂四齡日暴下如驚滿三日不水漿氣息垂厭厭迎
醫自外來告我脾氣完投藥僅刀圭久之忽話言晨興
喚阿娘舉頭索朝餐累卵勢已危槁面回渥丹誰云久
竟忘思之熱肺肝今我亦卧疾展轉春將闌扶牀問安
否念汝知艱難眼明骨骼聳聰慧令人歡百圍長豫章
固在拱把間善言山下泉所貴養蒙端我病行可起共
汝書燈寒

送呂廣文滿歸宣城

呂公非熊孫況是釣鼇客紛紛較錙銖度越流輩百平
生名父子傾心研六籍至今老桂秋英英浮雲白膏粱
無餘味猶抱詩酒癖作詩動百篇飲酒輒一石壯游輦
轂下揮金無顧惜結交盡老蒼思奮沖霄翮誰白冠蓋
場薦牘中朝出咸言曳長裾頗善坐重席道固在八方
歸求乃有獲眷焉紫陽墟士子多於鯽吾人遭眼青斯
道立幟赤飛夢切星漢環像拱圭壁浮言川騰波定力

射中的誰能絃誦餘而肯為茲役曠野草木黃嚴冬霜
雪積旅館半開扉殘燈猶在壁當歌欲一放轉畏離腸
劇引領岐路間渺渺望行色

僕曩過海寧東閣之墟伏讀許郎中義田碑心
竊敬慕不已今觀祈川許公買田于姑孰昆弟
異居垂三十年復與其二猶子家而食焉吁何
許氏之多賢也作詩廿二韻兼書其事云

貧賤重骨肉富貴驕天倫淮南斗粟謠千古餘悲辛飢

劬篤孝友或在閭閻人風習曾未聞庶保孩提仁苟無
激頽波人道將荆榛粲粲田家花異代為之珍物情尚
離合恩義微故新有懷評旦公夙志吾其伸錙銖游麴
富衣被鄒魯醇委源祈水上拓壤采江濱離居三十秋
猶子隨天申即事曠百載奚止驚邦鄰坐令殘忍徒愧
汗沾車茵善端一以開天地臨明神眷言壽且康亶亶
雲來春我昔東閣遊列屋觀魚鱗中有省郎碑義庾高
嶙峋總功勳百輩一飽甌靡塵山川盤鬱在行客咨嗟

頻宗盟何多賢一髮懸千鈞史策幸見收詔此風俗淳
對菊無酒錢陶公同一嘆恨牆隈一種號歲寒
者開最遲第三兒堅編茅以屋之因成二詩呈
桂泉執文謙父與幾二友兄

菊開已彌月幸脫風雨厄清晨繞幽叢嗅盡不忍摘黃
中自爾尊未數紛紛白清醑僅一觴把我二三客可憐
乏酒資相見少顏色同堂不知心對面千里隔無酒豈
病我子言猶未擇

霜露氣已肅我菊將離披染白竟成紫日就顏色衰物
變乃化漸至理於焉窺兒曹強解事欣言以為奇東蓂
像茅茨蔭此歲寒姿惟茲歲寒種藥細開常遲蕭然抱
幽貞寒梅托深知

元夕喜雪以萬事付一尊分韻得一字

火城何煌煌風雪集萬室離披陸地蓮照此瓊瑤質百
卉不敢春天公亦多術此時游行人輪蹄聲瑟瑟尚嫌
濺焚膏開簾看疎密回風忽已定殘片沾書帙晴光漸

可舒寒事固宜黜顏巷廣文賢飢居初暖席高吟黃竹
章夢冷傳柑實呼我二三友有核共真率良辰愜清賞
把筆競題述誰家百丈竿光漾星毬一高樹玉龍寒竅
空戲珠出

送趙石照學錄

衛綰無他腸更生漢宗老喜公春秋高髮白面不槁學
省以文鳴用世亦已蚤撫視昆明灰僑居養吾浩頗從
諸生請薄言采芹藻雲槐午屋涼石壁晴波遶長嘯宇

宙間袖手忘餘巧分甘原憲貧孰計侏儒飽歸橐不留
金愛惜天下寶居然見山立偉甚迴瀾倒走也實後生
故典從探討三年費鷄談白日疾飛鳥四月下浙江舟
穩風濤少禾黍猶未秋湖魚去深渺巴川天一方醺醪
愁可掃公朝重老儒瑾瑜方藉縑行知矍鑠翁高議雲
臺表

送趙子善

趙君天資高秋空上鵬鷃勇猛趨道途於菟嘯風壑岷

江始濫觴道山隔蓬弱居然入無底萬里費行脚槃槃
石照翁皓首麟經學誰言厭家鷄端待啓玄鑰塞予同
嗜好四壁詩盈橐城隅遞往來三見秋槐落語別已良
難分攜真作惡竹萌美羊羖湖魚具羹臠川塗奉晨昏
至哉天下樂

送尤山長歸浮梁

朔方無弓車南粵無田鋪舉國以為良夫人不待學浮
梁士淵藪公其才落落正色坐紫陽師道可無怍

又

倜儻明大節
瑣細推秋毫
得失寧幾何
用志亦已勞
士習橘化枳
時情黍雪桃
抱甕息機人
智不如桔槔

又

千金市肥馬
聚鄰餉猴羹
伯樂坐長嘆
易牙斯骨驚
屋頭對山色
屋外喧溪聲
一卷考亭書
聊以陶吾情

又

孟孺不由介
鄭莊能薦賢
立談苟有合
遂賞朱絲絃
古

人不我欺古心時自鞭下言曳尾龜上言風秋蟬

又

齋居小如舟坐卧日為歲孔牆昏墊餘捨我諸生去循
資待青紫咀嚼無厚味行矣薦賢良晁賈上書疏

庭竹今歲頗盛瓜蔓復有生意閒居誌喜賦古

體二章

始余植幽篁但愛一夔足傍出者兩竿夷齊想高躅今
年忽六七環衛若臣僕雖無渭川多已可洗塵俗柔枝

不自持老幹相依綠月明琉璃滑風度琅玕觸亡羊笑
多岐白駒在空谷飯飽時一嬉相看忘寵辱

又

牙籌竹下筭手版誤倒持富貴可憐生憂懼亦隨之荷
鋤學者農頑鈍人見嗤春來種瓜蔓三秋以為期牆根
植芳援亂翠相紛披露襦見襞積璀璨黃英宜老夫日
抱甕子母看累累貧家羹不糝爛煮供晨炊客來莫輟
釜大笑山人癡一飽政爾難辛苦何人辭

題吳維申壽藏

人生類蟲蟄，坏戶各有時。當其未蟄藏，啁哳仍優伊。彼我鳴其天，至樂豈強為。天地性情露，百菓觀纍纍。華實自後先，至理不待推。掘泥取芋啖，殷勤種芋兒。面目或少異，一氣中貫之。大哉死生說，得髓遺骨皮。金丹誤末俗，羸劉例見欺。退之服硫黃，胡不決信疑。吳公善觀生，璽窩計早施。泉明欲自挽，征西無愧辭。吾嘗評其人，圭璧絕瑕疵。居鄉既恂恂，友愛亦怡怡。世人欲剗心，老子

不皺眉讀書廢寢食不用較黠癡白頭托交晚久別輒
相思相思即命駕屢日相追隨青山共對酒小閣還題
詩尋徑踏黃葉入寺看殘碑下榻無倦色佳客同遨嬉
多公歲寒意願贈青松枝

三月四日與思樂諸生遊東山以花落家童未
掃雨餘山客猶眠分韻得猶字

春風如少年盛氣不少收紛華悅衆目綠穉而紅稠剪
裁出纖巧苞萼相綢繆風雨一夕至飄蕩隨東流黃梁

幾清夢閱世等浮漚不如閉門坐思與天者游殷勤二
三子共泛晴川舟漾沙日色薄飄衣風力柔新禽吭乍
圓宿麥穗稍抽荒嬉重前聞小出聊夷猶幸毋多酌我
舉眼瞻雲頭

次韻何季通春遊長句

窮愁抱書癡念我得所獨空堂寂無人幽憤時仰屋出
門逢所歡如魚脫網目杜陵雖詩豪遺恨曲江曲何如
值昭代薄言此休沐登城見桃李大勝芙蓉褥繁花難

久居亦可暫延矚居焉衆甫集豈但一夔足遊絲蕩晴
空好鳥鳴幽谷躋危出樹杪列坐依巖腹恍遊麻源中
下視泰山麓怡然接妙語不翅拱圭玉春風天上來野
水涵芳醪能令醒者醒不洗俗士俗輦石誰氏橋振鷺
何巖瀑平生愛浪遊穆駿競神速晚知養靈源已失鬢
根綠癡點不同條萬事隨轉燭後車且勿催前夢已難
續聊為倚樹吟蒙莊有前躅

次韻許簿馳驛對菊

霜露日淒厲出門何所為游子畏簡書方舟汴江湄對
酒聊自慰望雲不堪持緬懷鄰曲間同賦斜川詩久行
邈難值枉覲心自竒番番黃髮翁歡言進箴規人生會
有役誰能抱長思天馬困塵路娉婷多乖離明鑑豈自
照枯著寧決疑曰余返初服林下申幽期嘯歌籠鶴起
穩睡床龜支明當過衡宇有酒君酌之

送許方所主簿

人生風轉燭苦宦如飛蛾以身償寸膏固寵將柰何所

以古賢達投紱居山阿上逃朝市辱稍喜漁樵過平生
習主簿風采世未多拄笏望白雲觀物同漚波忽復念
柴桑歸來盼庭柯夜月照初心鮮飈散微和幸有種秫
田小酌令顏酡亦有琴與書不樂理則那紅塵溢人海
萬室沈酣歌特立見此士高哉名不磨願酌冷泉水祝
公壽婆娑

九月十七日以長女疾重訪吳溪姻舊感而有
作

人生寓宇內一忻間百憂憶昔始來時炎風被層邱聞
鷄覓村巷有屋山之幽上堂集姻友樽壘相勸酬寒暑
互變化歲歷俄十周及茲履舊迹還為田舍遊渺渺烟
樹遙瀼瀼泉聲流所遇異故物木拱狐兔投村媪怪我
老秋霜潏潏盈頭餘生諒幾何夜壑誰藏舟嗟卑而嘆老
舉俗槩豆漚紆餘顧內慙遠慕前哲儔寸陰倘自惜庶
幾桑榆收

寄吳仲文兼東定宇陳先生

我文如蛛絲雖巧無所用不如懶婦緝亦可入機綜君
家有婦翁名與泰山重窮年工著書白日不虛送平生
邱壑心歲晚充賓貢金鸞恥司晨天馬辭羈鞅歸來洗
肺肝泉石聊可弄十年不見公夜夜勞飛夢

又

仲文懶脩飾政喜從俗嗔偶然過荒齋畧語已可人讀
書五行下交久意愈真門單力役重鬱鬱懷不伸賃傭
以月計寸取如魚鱗剥床已切膚范甌空生塵誰與告

鉅公援出清波津天高日月速天也胡不仁

冬夜寫懷簡清之弟

我年十二三事母極小心兄弟尤知愛同床僅一衾中
年忽遠別海嶺音沈沈歸來悲喜集淚下霑衣襟老大
以為期素髮各盈簪胡不日對酒人事好崎嶇年光催
發棹悲來不自任展轉復展轉風振簷鈴音

再用韻謝吳長孺

寒風攪旅舍夜月搖歸心更長不能寐攪衣無重衾周

南嘆留滯寓迹非陸沈壯士歌易水感激義盈襟字行
偶有合邂逅成朋簪古人貴澹交世路多嶮巖平生汗
血駒道遠當自任非君願寂寞歲晚畏知音

諸生社日約遊東郊分韻得九字

東風吹草青胡不及老醜霜莖日夜生壯志嗟負久諸
生強我遊良辰共盃酒林塘過午寂鳥鳴向高阜腰頑
漸可伸亦足開笑口平生坐綺語未畏龜首九揮手問
天公何者端不朽願言尊所聞浮華付芻狗

入祈山簡程南山

兒時侍先輩游咏風泉間蹉跎五十年日夜彫朱顏六
經浩烟海何能窺一斑後生益寡學嗜利爭觸蠻讀書
被笑嫵短褐慚雕鞍槃槃河南公孫枝長琅玕從師已
善問下筆初翻瀾吾兒年十八編簡苦研鑽兩門有書
種稍稱儒家冠吾曹老何恨但勸長加餐

縣博吳子剛坐雨屋以詩來輒和四首兼錄呈
邑中諸士友

杜陵拙治生屋漏連床床朝來勢愈急傾倒河漢旁四野漭為壑屹立祈山蒼倚欄一舒眺輕翔羨鷗行

又

北斗不挹酒七襄那用織人言越瀛島相去豈咫尺衆
方驚虛聲君獨尚古色可憐倚市門却笑繡紋刺

又

積雨潦盈屋民窮嗟剥床蝌蚪產竈下蚯蚓升階旁吳君後來秀文字兀老蒼紛紛俗學徒數墨而尋行

又

雨久懶出門但覺愁如織清溪走渾黃何翅高百尺魚
龍自驚恐雲樹那辨色中流漁家婦船尾亦解刺

寄鄭子美

鄭君熊虎姿痼疾居煙霞老天畏奇崛而乃斂爪牙四
大願安隱觀妙維摩家趨庭近朝夕勿藥岸烏紗但恨
遊吳人孤此雲窓茶

又

中年愛巖棲蛙步不出步誰能驅使之乃向吳門路平
生鄭公賢作尉歌來暮是父生是兒問字滿戶屢語別
遽相違悵望烟中樹

程南山手痛呻吟殊甚先君子嘗苦此疾忽爾
觸懷

江南地卑濕重脰什八九疾痛欲呼天呼天聽之否遐
思四十年父疾痛在手張燈為摩慰典衣沽美酒酌殘
稍安穩酒散復何有至今夢寐間恍聽呻吟口程公天

戮民據床誰掣肘真宰惡雕刻罰作獅子吼天風吸梅
淥晴光泛疎牖珍禽啼樹顛祝公千百壽

宿胡村口憶汪處謙

暮投三家村熏衣聊乞火山樓半宿雲風迴墜殘果喬
松不知年霜筠如許大民窮耄耄耕幽谷魑魅過泛醪
水爭清秣馬僮僂劉魂驚屢展轉長歌誰與和自憐羈
旅中身同蟻旋磨遙知長洲人擁衾猶未卧問余來何
遲數日艤江拖

夜宿仰村始見江水安流

溪行畏惡灘驚波柂欲折篙師自駭汗客子咸失色亭
午過睦境潭清見魚鼈同舟稍笑言快士飛玉屑夜泊
仰村口石壁黑如鐵夢回俯安流漁燈互明滅澹月漾
清波瀕洞浮白雪人生足憂患過者帆檣閱居然餘
一嬉申言警前轍風從蘋末來且濯中宵熱

登釣臺

羊裘輕袞衣臺石重鼎鉉加腹亦偶然誰令客星見蒼

茫夕照間猶見先生面心惟在江湖足不躡金殿巢由
去已久士習趨苟賤固祿甚乞墦紛紛競麟桓名節始
浚源黨錮終成傳士或甘義死恥共朝花變炎祚賴苟
存往恨逐朝電萋萋臺上草歲晚青自獻范公侈雄文
一字金百煉重遊嗟白髮素壁敢自占燕市求良弓疾
讀有深羨

與友人論詩因成五言奉寄稱隱府判

無日不把筆無日不作詩於茲五十年毀譽常半之江

湖諸大老吾友亦吾師機鋒倘相值喜極摩白髭經史
擁卧內理窟容可窺化盡至無迹斯乃稱神奇善沒至
海底始得珊瑚枝晴空轉霹靂驚走世上兒或來問詩
法正爾吾不知汪侯五年長蒼顏仍秀眉憶昔童卯日
精舍相追隨公能早悟入大吐瓊琚辭遺我紫陽篇滿
紙含風漪思公不可見此意將告誰

又

有客為余言詩也何所用溫柔養性真絃歌資詠誦古

人浩浩去花鳥分晴哢今人浩浩來各自出機綜人面
詎能同發矢必奇中騷雅正大宗漢魏亦羣從陶韋尚
沖澹黃杜千鈞重平生三千篇莎逕咽寒蛩

或人嘲余有耽吟之癖者聊以自解

上天出雲雨祇在須臾間江漢流滔滔日夜不得閒物
大聲乃雄吼地南山斑寒蛩咽幽草百鳥鳴間闕孰非
天者機強過斯致患一日不作詩有如廢朝餐積之五
十年簡牘高於山平生傲孤枕稟性拙且頑問君胡能

然歲晚肌骨完吐辭輒成章自知不作難再拜謝或人
抵掌翻狂瀾

筠軒集卷一

欽定四庫全書

筠軒集卷二

元 唐元 撰

五言古詩

奉于郭長卿為先君子寫墓誌

慈父昔棄背于今四十秋生兒不得力於世為贅疣三
年兀精舍一髮無私求幸得楊公銘文字江河流至今
篋笥間夜光衝斗牛龍石質未給刻梓宜先謀槃槃老

林宗大隱專一邱家傳定石本心醉墨池頭代間有異
寶千金每難酬願言迴腕力鬼哭聲啾啾折簡中書君
盟會松滋侯

訪子敬不值聞其將之宛陵兼寄士高允中二
君子

層軒六月涼庭草委幽碧郎君輟誦編翻翻迓來客茶
香透疎櫺竹影移重席銅盤瀉石泉沃盥炎燄失中州
太原家邈迤沿山籍蘭亭耿餘輝黌官展良覲如何油

幕姿早帶風霜色宛水秋空明敬亭朝露滴蕭條困微
官幾見祇行役緬懷雙壁彥青壁生羽翮望望不見君
荒城悲落日歸田養痾瘵無復辭鄉邑端居何所為
吟易盈帙

次韻汪稱隱先生辭紫陽月粟

斯人溺塵海千億幾由旬失意蕭條秋得時陽和春勢
燄動閭巷蒲伏笑市人榮辱豈至公天亦昧所掄夸毗
靡時好孰辨玉與珉所以邱園士垂白甘鬱湮神魚不

吞餌飛鸞恥司晨吾友稱隱翁仕也早知津頗荒陶氏
徑不受元規塵歷官守箴戒小物亦克勤過門問原憲
匪病斯為貧未老即致政宜升紫陽賓誰令坐高堂未
識席上珍公厨久寂寂庾廩猶陳陳辭粟見直道余言
昔空諄他年有下車谷口揖子真匏瓜豈終繫懷哉天
戮民

前韻奉謝汪璜隱兼呈騰遠公

我昔遊海寧行役動浹旬手弄斷厓月足躡松蘿春結

交半老蒼不揖無詩人購材入山澤那用資選掄獻璞
來崑崗琢玉不琢珉自論頗倜儻時論無少湮密勿魚
龍氏夜宴常及晨心交璜隱公義薄雲漢津我老未聞
道於君隔幾塵每當剝啄時稚子應門勤牙籤三萬軸
此士正不貧我為冷官累幸忝文翰賓君才實卓犖室
中羅百珍何時德星聚再見荀與陳俗士溺於口告語
每徒諄相看七十翁浩浩全天真持謠獻天子願作康
衢民

古意二首寄示金陵第五兒

水際淘黃金或在於山荷鑿苦掘井求之沙礫間力
盡金未出愴怵坐長嘆大禹收九牧鑄鼎知神姦冰兢
以自持銖積良不難寄言同袍子辛苦勸加餐

又

昔在卞和氏獻璞于楚王舉國乏良工委棄道路旁明
廷執萬玉圭璧燧有光此玉同出石知璞非不詳守道
貴不移則足庸何傷願無混珉珉靜竢詎能量

庚辰八月十四夜月色如晝余抱寒熱甚水火
因念昔年亡弟清之海寧歸沐是夕觴少母于
中園懽飲及二鼓明日被疾追思惘然

微飈颯蓬戶嘉此平分秋明月出東岡照我床幽幽攬
衾不能起寒熱為我仇仲也昔少壯負簞公府遊余也
與世乖栖栖荷鋤耨歸沐及良宵中情極綢繆歡言舉
少母東園羅庶饅竹樹散皓彩湛湛臨長溝進爵不知
疲涼露沾衣裘慈顏一以悅杵臼忘夙憂今我胡不樂

素髮空盈頭俛仰三十年倚伏昧所由高堂寂無聲仲
也埋荒邱衰疾乃見纏寒蟲伴啾啾蕭條委塵壘淚下
不能收

和青蚨吟

東海有青蚨南海有青蚨但知海水深不見海水枯母
前子後隨靡靡無他趨絮漆不可斫死生誓弗渝世言
子母錢此義古所須奈何立許語賦隧理已誣悁悁孝
子心哀吟清夜徂海蚨學不得子母與之俱

白燕篇

炎曦爍晴宇澹蕩池光虛挺挺復差差上下池之隅獨
稟西昊氣而為三春雛烏衣改故號素質明且都豈非
衆黑中能以白自殊珍禽効嘉瑞適與昌運符犁牛產
驛角宗廟之所須凡馬偶天驥子流汗血珠願君振高
翮慎勿趨平蕪遠隨鵠摩霄不作雉罹罟韓公羨二鳥
鍛羽嗟囚拘何如息危機保此冰雪膚

過王北山故宅感懷

平生王柳州去作炎方鬼書從萬里來妻子暫歡喜青
燈紅燭間幾為吾屈指一夢四十年故宅更新主入門
已淒迷四顧悲屢起當時讀書地廢沼猶蛙語期我以
晚達桑榆陰漫徙文成不救飢嘲笑已屬耳斯人秉高
義信誓如白水申言西州門嗟嗟淚垂雨

寒事已動促織入床下淒切數聲有感而賦

詩人咏蟋蟀亦復變其名莎鷄與螽斯應候同一鳴誰
云四壁寂嘈聒兩耳盈有如合衆樂宮徵難分明白露

下百草黃落溝塹平此時傍我床淒其三數聲穴居罕
倩侶槁壤弗求羸鳥獸毼毛具爾翼如烟輕何以禦嚴
冬衣褐非所營物生天所開雖危而不傾爾寒可柰何
聊以寄吾情

舊客分庠賦落葉吟有懷伯雲邵君重作

昔在分陽日一夕生秋風脩廊何所有落葉紛殷紅凌
晨挈敝帚掃入泥爐中勢急若燎毛少借春融融邑小
產薪木浙瀨為之通胡不礪斤斧躡屩隨樵翁或可採

苗翳旦暮齋廚供落葉何足取過眼成空空我亦私竊
喜學書聊自工牖屨易見毀運甓勞微躬有如等幻化
吾師西竺公伯雲闢其門氣意超冥鴻念余太癡絕屢
約遊城東沃以太白杯醉貌還嬰童斯人不可見新寒
摧井桐

贈風鑑陳梅厓

寒厓著幽花旭旦清徹骨含馨待微颺弄影邀皓月斯
人從何來兩眼明霜鶻東家賣餅婆微賤不可忽縱文

一入口銅山亦尤物富貴隨黃埃萬事悲白髮語君種
花法生意驗根撥不如且相心妙處活潑潑

星源王氏雙溪詩

我昔遊吳會具區際遙天四年客秦淮屢刺東江船蓬
蓬吹黑風蛟鱷口流涎魂驚膽亦掉通夕不得眠還家
見畫本示我雙溪篇雙溪水油油日薄生蒼烟天仙剪
銀河落地紛兩淵寒光蕩莽蒼雨絕鳴百泉誰與倚釣
竿魚性安且全馴鹿手可麾草軟如重氈種玉在西戶

築室仍東偏其人古衣冠其俗陶唐前棗栗待秋熟牢
豕承加籩歲時讌姻友笑語相蟬聯吐吐江海士白首
隨勞牽不如住雙溪邱壑子所專桃源迹易陳愿谷丈
空鐫何當聞君門繫馬松根邊煮茶幽澗側題字懸厓
巔操瓢飲上流濯足臨濺濺隣曲倘見招共拍巢由肩
一冬久晴井飲皆竭十一月十七日連雨

冬乾井已涸晨夕汲前澗泥淤不可食奴隸屢興嘆池
魚命數百無地可容竄誰歟輦馳象為爾一笑粲黑雲

馳鐵騎漣漫塞霄漢遲迴久未決真宰昧冥筭建瓴送
疾響濕羽過雙鶴躑躅荒薺根鮮明黃菊瓣妙舞萬瓊
妃氣肅巾帶緩愁消旅瑣瑣神竦升日觀篇成寄同袍
毋詬長卿慢

歙東汪氏脩齋堂作者多矣似乎不脫窠臼輒
賦三首然亦未知孰為是也錄簡洪存心

世途鼓異教四大謂假合甚至割肢體亦喂虎飢渴我
惟能脩之萬物至几榻孝友出天性研窮至毫末善保

千金軀冬裘而夏葛

世途鼓異教視家如火宅棄兄而離母相顧同路陌
人有嚴君令行不馳檄歸休浣厠踰石氏好風格多財
貽禍胎我則守清白

汪氏隱東郊荷鋤識奇字身在蓬蒿中能致天下士
金石調大呂雅奏在階祀吾老不諧俗何能與吟事枯木
削繁柯至味本無味

正月初六曉寒吟一首抄與存心文玉二心友

老人多不寐我睡鷄報曉流俗溺沈酣我飲不嫌少飲
少心自醉宵長幽夢繞睡眠一以開哦詩探幽眇春山
多草木鍾情在花鳥沙場走萬馬江流聲浩渺超搖謝
鮮華髣髴入枯槁區中百念銷度外萬物小毀譽常半
之何取太玄草不如貪美睡餘事付一掃疎頑猶未降
嗒然仰晴昊汝其毋弛勞尚愛天下寶

分韻得隔竹敲茶白

南薰不作涼空齋方睡熟起來四無人門閒動脩竹晨

酣類渴羌啗雪亦不足忽聞竹下童拈槌聲斷續力微
振遺響誤聽禽啄木金芽爛若泥飛磴同清馥火然枯
材薪水汲深澗瀑居然捧玉甕灑灑日出屋平生剛制
酒茶經兼水錄誰憐玉川子白駒在虛谷

孫君別去三十年來訪道舊贈以五言

野山產詩人伯也亦賢仲一聞天台賦歲月老賓送精
廬識仲容幼小不好弄手持一束書朗朗能成誦別去
三十秋過門疑是夢子甚好吾文吾文實無用譬如野

璽絲雖多謝機綜刻石出佳硯意比蒼壁重善保歲寒
心滴水自成凍煩君報子真谷口喧晴暝

七月初三日大雨十五韻

山田禾欲焦到手接欲碎桔槔聲告疲淺瀨魚可膾田
翁撫膺嘆哭入青山背十日汗流漿炎曦時暖暝雲脚
向他鄉吾山空掃黛天心終悔禍賜以大滂沛豈惟潤
松杉潛聞響溝澮我知上古時甘雨不破塊今焉豈不
然勢急未容退午殘過申酉涼意增百倍瘡痂謝爬搔

治生賴畦菜山川出雲雨世遠事亦昧人方倭土木拜
舞嚴像繪林深咽笳鼓遄已偃飛蓋陶公雖止酒小酌
聊自酌

聶仙醮事約黃竹隱不至是夕大寒有懷閩中
小兒桂芳是年閩地大疫

霜風早戒嚴策策鳴不已山空禿草木禽寒嘯於鬼斜
月挂疎櫺藜床如潑水燈殘落餘燼窺杯走飢鼠吾兒
客閩南理齊吹凍耳地偏氣候炎民病想蘇起吾寧寒

自骨且為兒曹喜問渠竹隱君何妨印屐齒玄鶴自孤
飛尚念同袍子

汪氏東城秀野堂

昔賢古衣冠獨樂匪自樂廟堂拱穆清三邊無警召退
食行家園花竹助吟嘯長翁殆天人異世想高蹈偶然
題秀野機發近於道秀則本天真野則非俗調君家裔
魚龍玉樹炫年妙買山東郭隅層軒侈新造宣尼重竊
比考叔尚純孝匪惟導版輿亦可發詩興良辰集冠蓋

金史卷一百一十五
卷二
池光搖醉兒奈此槃散翁幸免平原笑

謝友人贈羶韉

沙漠秋草肥不似初平化何年拔一毫黑白皆待價長
髯資烹庖時祀承類禡湯燂百沸餘磨刮無少罅捲成
代布襪綾錦知己卸我老足槃散廐馬久不跨留之擁
泥爐佳境如啖蔗恩忘燕玉溫分絕雙不借挾纊事庶
同故物豈其亞矯首白雲原為我煩多謝

喜兒子桂芳闕中安問至

秋風利如刀已覺摧物性晨看石耳尖雪色遙相映之
子寒無裳冠敝不待正從嘲鬘登山自怪虎投穽惟餘
汲古心皎皎匣中鏡吾兒客閩南久乏問安訊今旬兩
得之喜色上眉髻呼酒擘霜螯起我幽憂病

送王國佐歸燕山昌平

王侯來京師鷁首指南紀澗瀍記初程遙遙四千里題
興煦民窮赤手濯瘡痍曰余畏簡書自願直如矢攜書
亦何為芝蘭滿階祀陶公雖多男志在梨栗耳泮宮槐

夏清永晝鳴蟬始展卷窺誥盤辨疑掃糠粃如何絕塵
中見此斑駁駢家督拜親闈搖搖隨舵尾秋場棲餘禾
桑果就條理需孚宜戒嚴旅瑣慎行李雍容過里門雜
逕遠墟市回首望白雲中庖營滫瀡清秋以為期黃華
香靡靡

貧士吟

無方鍊黃金為士多賤貧詩書擁四座出門無故人貴
人自天上高座憑華茵叱咤即雷電趨走生黃塵勢去

忽淪謝祗隔昏與晨第宅鞠茂草庭樹推為薪似不若
貧士履穿衣結鴉我膝肯自屈我眉聊得伸

野鶴棲于樹兒童誤指為鶴者感而有賦

屋頭有老樹野鶴羽毛長高閣一凝佇羣鳥倏來翔兒
童認胎仙喜告足踉蹌出戶為笑粲紆思增感傷嗟哉
青田種羽族超等常素質景西兌朱頂融離方清朝越
羸海薄暮遊瀟湘老壽媿日月颯爽含風霜飛霞逐仙
珮瑞世符鸞凰俗眼類生脂玉石同崑岡無鐵有爐步

買官得山郎入座即驚客臨岐易亡羊沐猴那可冠石
龜安得腸嬋娟委異域疥痔窺臣墻謂鏌鋣而鈍謂蕭
艾而香物情亂真偽世態輕炎涼幾先諒弗審良田收
莠稂區區鸛鶴辨楂柚倘見嘗於焉備觀省豈曰侈辭
章

書懷

鳳凰食竹實連林能幾許那知飽欲死而有太倉鼠餓
鷄亦何為已欲碎肝髓不如風枝蠋心情淡如水未能

免怨嗟有若旅也語閑居味無味得蠟但深咀善保幽
人貞無取亦無與

出門即大道官堠何離離霜露集歲晏游子將何之南
行五桂嶺北趨沙磧陞相逢異骨肉對面誰相知常恐
悲逆旅無以慰渴飢不如掩關坐頭著白接離吳中酒
味薄亦可時一揮

夜夢入里門還如童子年衣裳喜粲粲垂髻及吾肩追
隨二三子拍手當華筵坐中諸長老誨語嘗蟬聯疎身

知警言發我心時自鞭朝來對明鏡居然歎華顛安得顏
再紅拱手父兄前

暇日登姑蘇古城望靈巖諸山作

我本山中客見山如家人坐卧與之俱脈脈情相親吳
壤雜沮洳關市紛囂塵官河盡污濁草樹無鮮新城荒
遺古迹暇日躋嶙峋虎邱呀然張靈壁高而蹲白雲去
浩浩碧浪翻粼粼長風天際來吹我頭上巾誤尋金蓮
峯疑涉沙渚濱忽想劇苓具亦思垂釣綸超搖謝羈旅

邂逅融心神葭葦踐風志水竹諧新隣但恨歸路迂
明
朝迹易陳

憶昔行

去年蕤賓月我向黥祈山山澗泉噴薄猶聞雨耳間
杳杳入村逕蕭蕭經石壇沙平集鷗鳥溪盡仍林巒
樵蘇共爾汝村酒雜甘酸籃輿度深密墜露聞聲乾
僕夫告疲病不覺汗我顏自扶枯藜杖稍出漁亭灣
因人僦蹇驢顧影聊據鞍驛途就夷曠奇峯競巔崿
借榻得熟睡

披衣兼正冠兩縣遇姻舊開筵繼清歡孰知夢寐餘倏
異苦樂端經歲留吳會局促居冷官素餐雖自忝朝藉
不盈盤諸生劣識面長揖自作難矧茲度酷暑煩熱薰
心肝汲井啜黃濁中夜起長嘆同袍念傳雲衆口嗤伐
檀我家在烏聊麓竹數百竿兒曹煜青燈書聲當夜闌
山田粳稻白機舂千杵殘采芣仰菰韭柿栗秋班班潭
清魚可數足以供朝餐里閭盡揖遜升堂遂檀樂歸舟
何時發反畏歲月寬聊為憶昔行把筆宜重刪

湖州張守復還安定先生墓道詩

師道久不作後來無舟航蘇湖耿遺化人去骨自香埋
玉不計年湮為葑菲場異端塞正道今古含悲傷孰惜
天下寶野狐恣披猖行人但喑喑誰為驅牛羊豈無豪
傑士奮臂搯其吭終焉坐荏苒日閒炎與涼槃槃張侯
來二千石惟良詩書敦夙尚秉志百煉剛退食攷郡乘
揚鑣陟高岡依依詢故老懇懇還侵疆令行若破竹摧
拉驚秋霜崇簷映碧瓦跨水飛朱梁堂成列盥罍藻薦

薰芬芳矯首雲中君悠悠歸故鄉海道失常性水怪紛
鵝張桑土隨蕩滴赤子嗟流亡安得劉彞輩為國輸忠
腸為學貴適用日月垂晶光哲人不可見拱木烟蒼蒼

封門作

鰥魚夜無眠老翁常似之兒時聞此言見嗤仍見疑奈
何齒髮落身親無寐時羈棲送白日奚喜亦奚悲剪燭
照四座文翰相紛披亦有樽中酒興來聊自持如何展
復轉遙夜成淒其冷官安分義纖芥敢自欺積金生怨

尤吾寧抱朝飢頗思西崦田
薺麥光離離願言返初服
歲晚無磷緇

書窓明快喜而有作

愚生百不解粗以書自怡
悵恨老而學辛勤亦何為
客齋愜深穩牕暗頭屢欹
稍遷近明快斜雪紛相窺
濛義會冰釋難字祛狐疑
有如鏡去膜不用投良醫
吾人具萬善昭質曾無虧
柰何喪本真亡羊牯多岐
陰曜揜沈翳摩泥混塵緇
自非被濯功汨沒觀毛皮
即事有心警

詎曰侈浮辭寄言同袍子庶用此道推

二月十七日偕汪謙父與桂芹二子遊桃塢分

韻得陽字

吳儂罕墓田收骨投森茫枯羹了寒食城闕邀紅粧東
尋虎邱寺却入桃花莊塢中十餘家樹藝面朝陽草木
抱恒性矯揉殊可傷剖柏象方圓抽松出蒼簣童童養
柔卉宛若鴻鴈行霜雪不到地風日為之障成材迺貨
售宿土多所將此邦號富庶琳宮兼寶坊百金不吝費

實諸欄檻傍牡丹最奇特魏紫姚家黃紅者勝拖朱白
者如截肪蜂蝶不敢飛金蕾緘天香花時攢繡轂照耀
羅衣裳胡為二三子翩然來宮牆因人識地主據坐兩
繩床側身度深密復愛桑麻長豈曰逐時好庶用答流
光東風吹酒盃潑灑澆中腸髣髴日夜短白晳成老蒼
登城望浮雲嗒然思故鄉

次韻李青山桃塢之什

桃源窈而深初疑無路入紛紛紅紫間頗畏風雨疾闖

門逢地主如射喜中的謬承斯須敬休沐共閒適生子
非仲謀諸生慚湜籍羈愁苦封閉浩蕩天與圻倏看燕
成家應笑我猶客青山有高人頭白雙眼碧自言李耳
孫家學傳道德病餘誰裹飯益嘆世途窄佳遊重作期
尚借支筇力桃花幾時開縷指數晨夕

與枯林老

云何名枯林林枯容豈澤頗厭颺颺聲惱此清淨宅墮
樵煮空鐺飛籜響行迹道人布衲紋三薰暖潛入豈不

念無生人間方百劇微陽最下層衆黑中點白飛鳥起
牽牛重淵藏霹靂揣量孰有無將迎眇今昔譬如展明
鏡神彩收不得枯之復枯之何庸造化力不如滄若雲
且放十分碧清陰散午涼借我登山屐

次韻李青山白雲泉

靈源畜陽德天地為之先浩蕩潞震澤漚液鍾蒙泉衆
竅出寒溜外潔而中涓文魴自瀟灑弱藻同漪漣於焉
錫嘉號英英白雲鮮下有蒼蘚合上有藤蘿懸藉草聊

少憩短策欣輕便危石儼環侍幢蓋紛金仙墮樵拾澗
底細茗供烹煎一酌滌幽憤再酌辭勞牽叢祠脩秩祀
橫磴相攀緣奔走煇翟賤軾綏侯伯連龍門既展眺峭
壁平可鐫達人解會要廓視牛無金庶聞秘密義如窰
甘中邊乃知涔蹄中來往萬里天賀老歸江東重遊在
何年

釋悶

吳人重水族朝羹必烹鮮蝦鬚亂枯面蟹殼大如錢誰

謂能誑口咀嚼亦徒然不如歸江左土燥物性堅蘆服
辛透鼻蹲鴟徧山田早耘濯玉本剪摘小春前粳稻浮
甌香饋遺尚豚肩臘殘瀉家釀無灰味乃全生女不出
門潛藏護嬋娟百金買葬地兒孫得延綿吳俗正不爾
自多寧自憐久客衣袴敝和灰効煩攪愁來不成寐一
夕成三遷舊山竹千个颯爽含風烟忽思最稚孫學語
應初圓迎門始見之我喜殊欲顛顚言白日速力叱羲
和鞭

墨研至寸許猶不忍棄

昔聞李廷珪製墨如點漆邇來剝松皮頗說葉茂實歲
月暗消磨論功歸簡策終年不忍棄投閒依研席

送鮑子椿廣文

慶歷名父子相繼興吳庠南園有餘地黍稌秋風香文
教自茲盛古木猶蒼蒼瞻言一飯恩吾曹詎能忘

又

三年客吳校喜讀樂圃碑淵哉道義言字字含清颺橫

經多暇務木石亦愛之賤子願執鞭吁嗟不同時

又

吾弟投烟瘴淒其廢歌詩廣文當細滿餞送寧無辭泮池楊柳樹日染黃金絲殷勤折贈君無忘談笑時

舟行書事古體

我家大江東去吳僅千里塗程日倍進旬浹亦可止柰何逢惡灘急瀉直如矢就淺舟愈膠沙石相披靡憔悴同楚囚留滯嗟遷史人生百年內千憂餘一喜不如忍

須臾擁睡黃紬被徐徐踈穩安佳境啖蔗似子房豈不
勇甘心圯上履

舟行有勞歌一唱百夫和篙師據柁尾制命唯堅坐風
牽沙路長露宿天星大冷官無寸榮歲月不易過往來
竟何為真成蟻旋磨倚篷俯漣漪至淨不忍唾前途灘
漸窄雨作吾當賀

我聞三十六定數不可移三百六十灘汭流始於斯遇
坎法當止登途覓平夷誰無千金軀與爾角險巇江海

浩無底濫觴人不知至柔蓄剛烈禍發常遲遲君子懼
探湯小人甘若飴

昨日聞遣戍道上不逢人今朝泝灘瀨篙工多苦辛上
灘劇登天濤山洶如銀險極有平理地勢元相因官軍
不可言肆螫吾皇民變彼寒閨女尨吠感悅巾天高白
日速哀怨何時伸

干戈本不仁士卒亦亡命平時養育恩緩急驅戰陳朔
風吹大旗主將申號令云何號暮夜劫畧殆欲盡古道

重律臧今人輕壤冀師行受奇禍喟彼嚴陵郡

又

小舟苦熱喜偶
得雨襟懷洒然

昨日汗流漿今朝雨如注張皇挾風伯吹倒長堤樹敗
絮生蟣蝨成功歸篋笥何為重見收恩情不可棄譬如
老將校身退即憔悴一朝插羽檄上馬騁逸氣人事有
廢興炎涼亦天意

少小弄柔翰寧無用世志謀仕豈不早頗為造物戲蹉
跎三十年始知袍笏累驅馳事迎送嚼蠟了無味薄暮

歸空齋昏昏惟即睡縻廩孰云多捫心自慚媿上負罔
極恩教育亦何與今晨出檻猿跳躑暫適意因悲遊宦
人處身異愚智愚者可補過任智有鈍利苟不拂衣歸
俛仰易成喟

吳會無清流渾黃日滉漾牽挽一夫足官塘平似掌如
何江源水迺出練川上百人挽不前狠石矛戟狀崩騰
東長峽截薛壓危嶂封羊薦芳馨忠信神可仗水程既
淹留山木有奇賞暮投街村口雲氣侵燈幌美人期不

來引睇注遐想獨立佳境亭溪風生颯爽

又為亡弟
清之作

子生何不淑海嶺歸無時我老獨後死涕泗常交頤信
宿頻夢君身長聳疎眉有語不肯吐鬱鬱成凄其惟餘
翰墨行歲晚虛前期人事有哀樂陰陽迭推移逝波不
復還浮雲空四馳我哭那得聞我哀那得知

八月十日浙江遇風

風姨恣貪殘河伯亦不武須臾挾急霆滔天同震怒篙

師掩不備輕蓬盡掀舞望迷疑駕鯨勢急若逢虎倉皇
可無驚忠信良足怙居然波熨平長虹掛江浦萬事等
兒嬉欣戚漫相補岸幘臨新涼缺月翳復吐

登上方寺望吳城懷古

今日天氣佳散策經林邱遺禾尚棲畝垂柳羅道周鵝
鵲洲渚雜鷄犬村虛幽行行指新郭茅茨一何稠衆山
忽奔突浮屠居上頭湖光自吐吞艇急如梭投吳城百
萬家俯視蒼煙收青天白日速歲晏浮雲愁越鄉重吊

古涕下沾衣裴粉黛假窈窕蟻穴夢王侯冥冥掛劍樹
衰朽不可求百年狼虎爭一夕麋鹿遊想當帶甲士今
日趁鋤耨古人浩浩去來者無停輟縱酒志易荒學仙
事謬悠不如以善名此生無悔尤欲歌誰與和山木風
颼颼

歸來乎山中

我本山中人不知潮與風重岡固局鐫帶水容舳通薄
游向錢塘飛濤捲晴空平堤過萬鼓戰鬪方爭雄吳庠

故多樹老檜連栢，雜篠既鬱鬱，弱柳仍童童。驚颺
一夕至，撞擊迷西東。窓戶自開闔，葉走無停蹤。奔何
時已？天地幾轉蓬。猶疑浙江潮，遠勢來溟濛。睡眠不得
合，燈影昏房櫳。明朝覽清鏡，煎愁成禿翁。頽齡諒能幾，
歸來乎山中。

又

今日一葉落，明日一葉落。清晨窺樹間，枝空竟蕭索。今
年落一齒，明年落一齒。齒落無與繼，太息吾衰矣。葉枯

望再榮齒落殊無情歸來乎山中芋糝猶能羹

又

少年惜白日讀書無倦時大醉水齧面少赴青燈期迂
疎背時好不畏寒與飢東家起高樓西家蓄蛾眉須臾
就煙滅翕翕成淒其顧我床上書三世無磷緇歸來乎
山中兒曹共吾伊

十一月十九日先君子初度有感

陽生無盡歲人世胡不然吾父昔初度迎長相後先弟

兄著新衣肅拜華堂前姻友滿四座肴核陳芳鮮潑灑
真珠紅松明斫豚肩兒年正娟好對客誦詩篇徐卿家
二雛或可稱才賢俛仰四十載樂事隨浮煙令弟投炎
瘴遺骨留荒阡婉婉小女兄閨範人猶傳老大客吳會
四見溫井泉設位薦時食淚下如奔川稚子勸勿哭哭
多損中悵此意汝豈知悲極言難宣魂來渺湖水雲輯
想翩翩魂去江樹昏烏影沈遙天吟成不忍讀危坐梅
窓邊

聞禽吟

暘鳥翔海隅澹澹天光白棲禽詎容安引頸舒羽翮能
鳴殆天使清圓兼磔格百喙盡伎能予以寫胸臆迴翔
有顧念凜凜懼抨射山人睡初醒四壁雷鳴息披衣踞
藜床整我頭上幘多言始自悔不如尚玄默岐山鳳不
鳴衆鳥嗟累百

筠軒集卷二

欽定四庫全書

集部

筠軒集卷三

詳校官庶吉士臣陳若霖

中書臣劉源溥覆勘

總校官進士臣楊懋珩

校對官助教臣胡子襄

謄錄舉人臣鍾廷瑛

欽定四庫全書

筠軒集卷三

元唐元撰

五言古詩

客齋感興

老鶴羽翼長引頸鳴閣閣枝間一么禽清響透寥廓
騏驎日千里乃受金羈絡不如退耕牛日斜卧籬落
詩窮鼠五技名爭蝸兩角陶公未歸來昨非今已覺

又

六籍經秦灰訓詁殊有功高談議漢儒何知爾二蟲後
生守一經紛白猶難窮偶然取朱紫驕氣發滿容三傳
束高閣忸怩紫陽翁駿骨已食豆熏衣列房櫳坐令刻
木徒見詬常彎弓豈無清苦士秉志如霜松

又

金性可從革烈燄看瀦流石頑不受鑄錐鑿何時休媧
皇始補天事去今悠悠精衛亦何為乃作卒瘁憂海波

中不平民疾殊未瘳偶然出郭門蔽港牽千舟坐令梅
檀林見此佳麗州生公來說法是中還點頭

又

南飢死即休北飢乃南來昨宵過村墟屋材隨劫灰何
但感巾悅驚仆鄰嬰孩寒衣被爾體破甑委牆隈南北
共廢壤中臨炯三台譬如同乳兒焉問才不才有來觀
風者咄此民窮哉

十二月十四日過平望

歲晏意荒荒雲寒低薄日太湖蓄巨浸東走平望驛驚
師尋曲港舟尾不容入問爾何所為官醪勢無敵危桅
蔽川面黃旗飽風力古初猶淡薄煮海事殊失利源開
一孔橫放無終極齊魯議莫勝桑孔已破的何如燬牢
盆亭戶改耕織吾民戒口爽大官減供給折衡人不爭
區區陋智術

送周繼善弘道之廣東

讀書坐高閣城隅聽朝鶯粲粲瓊樹枝依依兄弟情中

途忽險艱功虧嘆無成冷宦適為累飄然遂遐征遊吳
返故廬簡牘中前盟堂虛竹風入新涼拂冠纓於焉訪
古寺逶遲幽澗行汲井漱我齒倚杖看巖耕如何塵坌
牽雨雪淹歸程人事好乖異語別令心驚遙遙指嶺海
蠻花掇芳英趨庭篤禮訓所貴匪金籛願言思公子春
草日日生

夜坐

平生愛熟睡常與佳夢期萬事坐不理百拙何所思當

其擁衾寐驚呼殊不知日晏未進饋睢眙眼生脂如何
卯申縛不作泥中龜踞几對書史口誦而心惟燈明欲
語我鷄聲一何遲吟肩苦山立不計毛髮衰老學宜自
攻振懦真吾師支離華山叟吾道分兩歧

觀羅仙石上狼迹

仙家養白狼能與天地老朝飲崑崙源暮食蓬萊草羅
腰忽騎來謂是此溪好惟餘石上迹落落不可掃陰陽
日夜移人生誰自保仙人久亦化石色白皓皓老牛工

礪角牧豎卧結藁陵谷易變遷萬事幾顛倒我生後千載胡不遇公早無方制頽齡有恨縈離抱但聞橋下水喧豗流浩浩

酒醒作

小閣酒初醒雨鳴林下屋夜深境彌清宿鳥翻叢竹披衣剔殘燈展衾幽夢續塵勞憚江海野性羣麋鹿始看風雪晨林花今蔌蔌餘齡諒能幾居然髭毛禿胡為驚虛名巖耕期抱犢

雨齋社日

細雨濕青山澹然見林姿衆樹未云綠對此芳菲時
鄰僧俟我至竹下茶烟遲既來興易盡未往還牽思
粉榆田父醉陌上行扶兒忽復念閭巷三年違祭祠
豈無一杯羹笑語同齊眉丹墨方為累掩卷聊自嗤

哭亡友潛夫洪主簿

我有古時劍藏之三十年當年為君舞謂我名龍泉
我有古時琴尾焦猶著絃當年為君彈六月飛霜天
收劍

入寶匣光怪常自纏挂琴在幽窓誤觸風蕭然知音諒
靡存淚下如奔川

又

古道無人行古鏡無人照今人自今人安得古人調平
生蚤樹立恥以名自釣有口不論錢頗被同儕笑過門
讀我書電眼閱衆妙偶然共快飲岸幘欲大叫立談古
樹間解帶圍十抱送之出柴扉又愛山光遶百年大槐
柯更賀迺成弔俱亡人與琴無復聆清嘯伊人鐵作肝

舉世扼為貌九原雖不起佳兒尚能肖

又

跋鼈強登山騏驎日千里勉焉那得近流汗血盈指當
時同隊兒孰敢窺涯涘比長肆成章萬言直杯水師說
早能持乃自吳校始所至奪重茵仕途觀素履如何山
中縣冰火遭機鬼秋風黯黃落日就曠肌髓余時震澤
還執臂各歡喜君言需小康共此盃炙美蹉跎風雪晨
蒲伏城東市斯人死不亡馨香化蘭芷嗟我匪岱嵩光

芒即箕尾但悲平生言何繇再傾耳

五月十七夜極熱

祝融始嚴駕朱鳥爭呀呀羲輪向西頽列宿森如麻缺
月翳復吐熖熖蒸癡幕林風靜不發起坐徒興嗟髮短
恨不髡渾汗煩搔爬螢光善開闔乘機助紛拏禽寂
無語蛭竅工淫哇翻思水仙府蕭瑟魚龍家玄珠出海
藏鮫綃織天葩綽約自玉肌勞生同縮蝸煎熬閱寒暑
髣髴色倏已華念汝四序更白露凌蒼葭達人會至理與

時同變化葆光匪外榮歲晏期無瑕

九月四日池上泛舟對菊分韻得菊字與鄭元
章遊二生并兒桂同往

今日天無雲秋氣轉清穆駕言臨深池盪漿追幽矚須
臾層波生疾響振林木船頭載芳醪船尾插時菊延緣
入葦間頗驚鷗夢熟魚跳供糝羹登俎間野蔌吐此文
翰侶胡為在空谷邂逅適清娛詎嗟毛髮禿緬思平生
遊歲月如轉燭舊交日彫零新知欣在目尚煩澆磊砢

羈懷庶云足作詩寄來曾剩欲題脩竹

郡庠上宣差詩時卒伍有豪橫者公為除害士

民悅之

吾聞段太尉一麾守涇城于時王子晞領節居行營士
卒縱無賴持刃誰敢嬰入市刺釀翁酒由地中行太尉
奮髯戟撫几氣不平繫囚十七輩斷脛令人驚至今青
史間熒熒垂令名山城聚惡少迺者何縱橫蜂奔而蟻
附鬼嘯連鵠鳴婦女被羅織貨賄成丘京投鼠恐忌器

城狐任紛爭一朝奇禍作衆矢遭彈抨使君坐堂上叱咤風雲生黎氓願嘏肉部伍思分羹犁庭掃窟宅邦憲其敢輕投畀禦魑魅械束軀莫撓民痛昔未蘇汝罪今貫盈徽人去大憝三市收奇羸頗聞負郭農相率趨東耕柳子既美段斯文叶韶猷我今頌使君實為善者旌續當鐫樂石千載常崢嶸

九月二十七日元與潛夫伯初小飲市樓季文後至酒酣慷慨懷舊情不能已

飲酒豈不佳所貴得其儔良朋既已至上我隣家樓樓
高極四望萬室如鱗稠紫陽接前榮屋西揖浮邱郭索
來數輩從橫類戈矛復有筥中魚果核亦易求清言領
道要諧詭非所投感舊屢惻愴論交重綢繆雲間有雙
鳥意氣橫九州豈同鷺與雞爭食而包羞紛紛黃落中
青山無悔尤

聞禽

端居謝煩跼適與幽夢期春風吹好禽鳴此高樹枝披

衣步前除喜及芳菲時雜花始向榮疎柳稍已滋

十月十九日晚夢中作四句續成一篇

夜夢吾少母懽言進清盃覺來淚盈眚雨屋雞聲催今晨梳我頭髮白如銀哉榮貴競時好泔泔牕中埃

城中少佳樹

城中少佳樹有亦不可即自吾來山中面對好顏色雲生影披披濃淡各有適朝暾羅奇姿軒然見離立堂虛勢若圍鳥上翼斯革須臾風雨喧白晝鬼神入河漢疑

傾崩螭蛟驚鬪格收聲向寥寂冉冉睇空碧游方始自
厭侯門事長揖聊從山中居願惜倦飛翮卽事愜清賞
於焉瀉中臆

九月五日登任守釣石識許友山奉簡

羣岡莽若奔清溪自環遶中有石巍峩萬古白日照天
監倭金人犧牲棄九廟如何得良牧燠休縈寸抱育子
從姓任戶至扶耄耄行春投釣竿適興取邂逅方來式
歌舞勿拜同思召清遊值秋晚蟬冷無留噪登危未用

扶撫石一大叫揮盃急酌之萬壑風鳴竅樵豎怪清狂
往往拍手笑後乘且勿驅前林明晚燒

讀鄉先達羅尚書作任守碑有育子禁問老人及

召伯甘棠等事故及之

遠實照切燠
休並去聲

余自二月望因疾止酒至七月朔凡一百三十
五日立秋後喜雨雨後早涼始進一杯

邠原本好飲對酒不肯喫淵明逃麴蘖止酒見篇什平
生揮大白號呼聞四壁柰何衰疾攻舖糟亦驚惕閉門

玩處女堅壁禦強敵今晨葛衣輕秋樹涼淅淅呼兒進
一杯借我童孺色昔聞重剛制無乃衛生術茗椀分策
勲醉鄉戒深入

二十日山中大風憶吳會作

我昔遊吳會衝風攬迴廊牕戶自敲戛秃柏摧長楊起
視五湖波飄忽失帆檣勸公無渡河蛟鰐齒如霜中流
幾遇坎膽掉神茫茫吾鄉山作屏百摺相揜藏日遲塵
不動微波皺橫塘夢回驚疾吹氣勢欲撼床尚疑陶朱

公散髮弄滄浪安居申前警終焉嗤面牆豈無白鷗天
駕此一葦航

二十三日疝疾作無寐感懷

平生有髮僧此事我知我羈棲仍卧病湯熨何繇假空
齋無人迹日光穿漏瓦照我床上衣紛紛馳野馬飢鼠
窺枯盤驅之復來下薄暮兒子歸有懷聊與寫落葉不
知愁勢急風兼打燈昏欲屢挑貪睡童陽啞抑憂轉頑
耐孰謂真衰情酒聖容可麾詩豪猶未舍

釋懷

山中朝聞鶯向夕又聞鵲何況不知名禽聲競啁啾窺
案愛凝塵門外罕來轍居然著一翁行坐把書冊何以
降睡魔茶甌頻一啜平生累綺語天私廣長舌晚似支
床龜閉息甘百拙虛舟足用世怒臂寧當輟持之問青
山可以較優劣青山了無言晴雲自明滅

山頭兩好樹

山頭兩好樹綠葉方華滋朝日上瞳瞳夕颺披拂之念

此長久根不為霜雪移飢鶻從何來奮竦不自持托身
既得所巢妃與其兒出則攫百鳥碎腦無流脂勿遭壯
士嗔丸擊當離披繁枝詎能庇但驚華葉衰荆舒恨閨
子咄咄空自悲范陽腹如瓠赤心終見欺聊為雙樹篇
庶效青蠅詩

二月二十九夜半起聞鷄聲

生無諧俗韻萬事付不理忍窮已爛熟幸不皺眉宇攜
書學山棲蹉跎易寒暑其中大快意鷄聲落吾耳羣雄

擣虛回決勝鼓不死長揚羽獵過助叫擒蒼兕萬松立
濃陰天清捲風雨多情誤竹肉無譜翻宮徵自吾得此
聲大勝享醇醴明當語旁聞咄笑不自已想像迹已逃
居然書溢紙會有賞心人撫床中夜起

疏齋盧公題郡學先賢閣余府推次韻命元同
賦

翳翳嘉樹陰穆肅初夏時高閣一以眺凝神練川涯況
茲文翰侶昕夕勤經菑藩僚率多暇詠歌在泮詩祥刑

悟公理內顧無纖私文彩增煥飾襟佩相追隨永懷紫
陽墟熒熒垂清規中流激頽波涵泳遂所怡珠貝爛盈
把遺我不復辭尚聆清言要豈恨還山遲

九月初三日曉夢亡弟清之兼懷少弟成之

晨光度疎牖旅夢方蘧蘧季也墮我前曉然見長軀趣
裝欲有適所畏在簡書出門再三顧別意何躊躇天清
鐘入耳叫鴈驚黃蘆幽戶無白日宿草停輜車為君一
酸鼻推枕成欷歔

少弟殊可念被髮夢北堂
戒公無渡河蛟鰐齒如霜
念汝亦何尤自顧成佯狂
收骨會有歸潸潸崇松岡
少壯不自保我老宜悲傷
悲傷不可言涕下霑衣裳
隣鷄罷三號薄帷明月光

村前一大樹

村前一大樹衰朽歲月移
絮之百丈長空有摩空姿
四垂垤螻蟻巨腹藏狐狸
積雨所灌浸野火燒炙之一朝
勢甚急西北狂風吹大聲
若震霆驚倒村中兒壞屋四

五間織婦傷其眉此物久不除蹉跎成禍基拔去眼中釘
槎牙化平夷傍株有嘉蔭衆愛扶疎枝

十一月初十夜客窓言懷

平生愛獨卧獨卧春融融飲酒豈在多但貴衰顏紅晚
餐近亦廢脾神尚清通猶憐燭下讀兩目磨青銅常恐
梗靈局揜卷不待終有如猿竊果既去尋舊蹤永思古
人心渺渺飛冥鴻窮追恨不前退懦當自攻太息重太
息窓竹搖霜風

日取霜葉供地爐作

乾葉下晴簷淒淒仍索索向來散衢枝喧啾巢鳥雀午
陰欲蔽空何畏炎曦灼風霜一以厲榮悴殊今昨取之
壅地爐稍稍青煙作本無貞堅質焰收嗤劣弱牆東汲
古井草帶相纏絡幽泉借潤色鮮新尚揮霍物微變化
間根柢重所託

再題霜葉

昨日落一葉葉落仍今朝落之又落之仰首窺脩條童

子戒掃除翕忽盈堂坳天風亦戲劇投隙敲巾袍我家
大江東觚櫓積風所操一從守微官枯寂同僧寮愛飲恥
空壘抱膝徒長謠欲歸歸未得渺渺川途遙我不如木
葉放蕩能超搖於身不拘束於人逃譏嘲出門語青山
日薄飢烏號

十二月二十六日曉度車盤嶺

纖纖月吐翳耿耿星回天風霜剽削人積雪盈道邊度
橋頓腰脚探策不敢前荒村絕鷄犬列宿瞻高縣暫憩

何人門激澗聆飛泉胡為倦行役纏糾區中緣老妻喜
我歸下堂趣烹鮮兒曹喜我歸跪請誦新篇孫雛列成
行眉目秀且娟我老不自休微名若浮煙於世既無補
有文何足傳願為農丈人勇撤博士氈形靜神亦安庶
幾樂餘年

十一日發舟宿浦口十二日過街口與鄉人畢
仲常同舟仲常浙東稅官

好爵磨世鈍微官生白髮往來三十年幾見蓬上月故

人致青雲倏隨飛鳥沒在者天一涯胡能慰飢渴篙鳴
柁并舉忽忽又明發羞囊亦何有耿耿不可奪行當過
桐瀨永走客星活高風徒仰止吾事正迂闊為謝同舟
人官曹分冷熱

日閱灘險入歙境七日

長灘七日程狼石相與角一罇劣容舟古人昧疏鑿巨
靈煮陰火百沸釜中作喧逐轉地雷傍觀驚鶻膽落篙師
亦慣見解迎知脈絡飽飯不償勞沽酒令軟脚吾人太

勞生外物從揮霍
攻苦償青燈
老大供一噓
咄咄何所成
躬耕負秋穫
命也可奈何
固窮慕先覺
拋書付年少
歸休守禪縛

詠程塾池亭景三十五首

登山

岱嵯跣配林海
瀾標碣石冥
冥登山道於然
資拾級巖谷中
呀張竹樹外
蒙密有如桃源
境導以榜舟入

秀野堂

新安舊澗瀝赤舄云歸休吾心豈獨樂畎畝同懷憂偶
然藝花竹四面春浮浮夢想五雲深清光瞻冕旒

漸入佳境

長康喜啖蔗舌本味有餘豈知達人心雋永傳家書香
馬塵外蹤曳杖寧徐徐垂堂有前警徒步如安車

半山吟所

烏巾上有天穩足視平地斜陽界石壁烟霏染襟袂長
吟吐古音浩思入無際怪藤工屈盤坐閱人間世

倚山書堂

堯廷文思深寶玩出羣玉尚餘天語香夜半光煜煜湛
恩延奕葉倚山書柱屋有琴不敢彈悲隨鸞鳳觸

路通脩竹

楊朱誤多岐道以通為直稽首虛心仙漫岡排萬碧醉
題認歌斜永嘯破幽寂怪石蹲其旁微勞憩腰膝

蒼雪闌干

坡仙善遊戲竹以蒼雪名續紛點闌干值此天風生曦

輪亦惱慢孰取陽剛精勿以色見我剪水同其清

遠開圖畫

遙繪拜新號髣髴宵夢真突來浮邱峯寸碧窺簾旌羣
岡列萬騎屯擁紛相迎鵝溪練萬丈天孫下垂精

極高

隨地有極高遐想崑崙頂箕揚斗挹潑下接寒芒耿神
之化為石日月山中永鳳卯遺蓬山笑拊微醺醒

梅邊竹外

梅筠三葉心張皇觀晚節羹調驗鼎實粉香紛玉屑石
床如砥平年侵乾蘚裂懷古發新題愧我筆無舌

蔬圃

平生用物精肥遯時蔬圃如何食肉相亦識牆薺苦剪
韭垂新春烹葵挹零露濯膩銷紛奢此味妙今古

桃李蹊

桃李在公門其人古伊周堂堂毗萬幾歸來樂一丘行
道集瓦礫寧遺珠履羞至今稱舊園賤子追清遊

桃李園

無言下成蹊，戢戢春風樹。斛量溢佳實，鑽核戎甚愧。諸
孫似方朔，隊魚總清慧。課勸此窺園，頗解陸生意。

春色茅簷

人間春色媚，迺在茅簷間。烘曲成直身，豈曰衣裳單。一
洗紈綺習，疊疊醇風還。寒梅結世好，早弄枝頭斑。

成趣亭

云何天機成，陶公淡世味。邇來屋其中，花果分位置。山

童敲茶臼應有佳客至脫帽髮蒙茸挂在蟠梅樹

紅翠亭

嬋娟絕流注黛假風中雲我寧種竹桃鐵帚麾妖氛紅
紅與翠翠非襦亦非裙一篆古龍涎宴坐娛朝曛

百花頭上

梅居百卉先山在最高處政須第一流著屐常來去心
探太極妙如持濟勝具翠禽啼無語月照橫斜樹

整屐

阮生好蠟屐一生著幾緡
齒齒陟苔階脩然絕塵想
萬竹如受圖頻敲振幽響
新梢看拂雲為謝饒夫餉

萬玉

意足兩三竿吹萬喧地籟
塗山委玉帛朝披成一快
殺青書租庸餘韻風月外
被褐懷其珍猶期魯公拜

嘉慶莊

后皇錫嘉種始出京華間
金錢買寸核甘脆傳人寰
坐看火雲蒸玉甃沈清寒
散髮乘天風不用嫌整冠

晚翠莊

松柏森晚翠凜凜雪霜晨高枝蝨其間歲見蠟丸新
龍割右耳葉大包根身居然入湯劑暑氣銷氤氲

樵逕

牆腰取逕微呼童入山中露濃濕雙屨詰曲嵌厓通
斧斯青瑤枝帶以山花紅烹茶聞烈響慎勿燃焦桐

桃源路上

桃源昔迷途今日天光開猶逢古衣冠共此清談哉愛

枝不為薪摘實看瓊瑰嫣然一笑粲蝶蜂母見猜

錦繡鄉中

春風錦繡堆管領屬花木羣芳擁後先成此百和香綸
巾風披邀客來相羊亭午坐石間臨風揮一觴

向陽花木

陽和煦萬類花木生精神重陰自寒沍見此黍谷春棠
花翻作洞錦帶如垂紳剛明君子操寸念全天真

脩景

化國日景長至人澹無為掃除伐性具稍受薰風吹葵
榴媚時景簷蔔光陸離願言享黃髮金石庶不移

晚香

東籬居震位南籬見佳山隱然陶令居心共秋花閨姬
公昔大聖居東多苦顏全高返林壑戲袖方爛斑

攀桂

攀桂承家風丹梯上蟾闕買書教兒子青氈我舊物沂
水澡爾身咸池晞爾髮明當上賢闕穩送霜天鵲

耐久交

紛紛世道交勢利不自保歸來拊竹石一笑成絕倒豈
無同心枝傲睨天地老人間耿青史猶知稱管鮑

好景

萬木垂秋實寒林燦青黃風霜日凌厲巽齒含天漿未
須羨吳姬入手三日香膝前環令兒好景思無疆

平安道中

佳竹報平安何年構深洞青瑤懸四壁縱橫若機綜狹

道劣容人輕
颺時自送石
磴卧蒼苔如
山常不動

春草池塘

草生覆平池
謝老夢非夢
千載足神交
微風助吟諷
黃閣割浮榮
退尋幽沼弄
手澤奕世傳
雲深偃翁仲

弄月池

青瑤削底裏
了無泥土腥
秋水清若空
瀉竇常泠泠
幽人弄明月
沉值酒初醒
寒光竦毛髮
梁筍涵三星

益清池

春陵有佳嗜芙蓉香益清池上月痕淡池邊人獨行天
機眇今古政爾同斯情飛鷗何許來露盤為之傾

千里池

我聞陶朱公養魚在深池玲瓏遶萬石魚行渠得知積
貨致邱山我心澹無為他年費雷雨觀此變化時

筠軒集卷三